



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Karbi Peace Accord taruba hopta sign asütsü: Himanta

DMA-i ken o agütsüba nung ajemdaker Delhi HC-i Ramdev jaoker



VOL. XVIII NO. 230! (ADOK 230) DIMAPUR ROGONÜ (THURSDAY) AAMI (JUNE) 04, 2021 ₹ 5.00

Nagaland COVID-19: Nisung 168 dak putet, 284 taneptsü angu

Kohima, Aami/June 03 (TYO): Nagaland nung June 3, 2021 nü COVID-19 tashidak nungi nisung 284 taneptsü angu, nisung tasen 168 dak iba tashidak putet aser pongu asü. Tang state nung COVID-19 active cases 4711 lir, ta Health department ajanga anogoshi sangdongba osang ka nung ashi. State nung Brehostibarnü nisung 284 taneptsü ngua tang tashinung iba tashidak nungi taneptsü angur ajak agi 16,489 jungogo aser kasa anogo nisung tasen 168 dak iba tashidak putetba ajanga state nung tang iba tashidak agi meneper ajak agi 22,240 alitsü.

168 dak COVID-19 tashidak putetba ya Dimapur nung nisung 51, Kohima nung nisung 43, Tuensang nung nisung 24, Phek nung nisung 11, Wokha nung nisung 10, Mokochung nung nisung 9, Zunheboto nung nisung 8, Peren nung nisung pongu, Kiphire nung nisung pezü, Mon nung nisung ana aser Longleng nung nisung ka alitsü. Kasa anogo COVID-19 dak sendakba tashidak agi nisung pongu asü, anungji tang state nung iba tashidak agi asür ajak senteper nisung 391 alitsü. Asür nisung pongu nungi nisung pezü Dimapur aser nisung ka Phek nungi alitsü, ta department ajanga ashi.

Finance Department osang Health & Family Welfare Department-i jangjatsütsüla: K. Therie

Dimapur, Aami/June 3 (TYO): NPCC tir K. Therie-i sangdong ka ajanga, Finance Department-i osang jangjashitsüba nung wara dak sendakba maparen balala nung sen crore 245.44 intokba sayuogo, koba district 12 dang aliba state ka atema sen aika lir ta ashi. Iba dak sendakba nung pai, Health & Family Welfare Dept dang Finance Dept-i sangdongba osang indang kuli tejanga agüja, district balala nung mapa balala inyakba aser osettsüt agütsüba kuli nüburttem nem metetdaksütsüla ta ashi. Tang tashi nung mozüki kwi nung Covid yipden, oxygen, ICU aser Ventilator facilities inokja lir aser mozüki kwi non-Covid ama shima lir, aji metetdaksüla. Maneni nüburttem quarantine centre kwi lir aser covid agi shirangertem anepalutsü atema shimmer aliba private mozükitem aser CIHSR densema sorkar mozükitem nung Covid yipden aser treatment angati asü masü aji metettsü nungdaker, ta Therie-i ashiba den Naga Hospital Kohima nunga ICU yipden atema taa agir magir aji metenüa ashishi. "Onoki nüburttem atema facility teperi amenoja kümzüka toktsüner. Onoki vaccine noklang nung noklang angati agütsükdaksüner. Onoki ajak nem mozü aser ration angati agütsükdaksüner. Nüburttem indang fund tem ya tajangzük angutsü atema jenjang tasak

infrastructures tem nung masü saka nisung taküm kümzüksü atema ochishia amshidaksüner. Sen crore 30 intoker aliba yagibo medical college ka atema infrastructure yanglutettsü," ta NPCC tir-i ashi. Yakbang nung inyaktertem ita aika itasen mongui pei taküm dena bendanga agüja inyakba mapang ka nung, department temi itasen agütsütsü renemdar ta ashiba yagi temulung masür, ta pai ashi. "Nisung ka ita shia ita sen agizüer ka süra ita tenzüker hopta tanabuba tashia matateter. Itasen magütsü anogo ka danga ayuba ya tim masü aser talisa yakbang nung inyaktertem shirnok anogo nung ghonda 24 inyakdar parnok asoshi tim masü," ta Therie-i ashi. Kasa mapang nung pai yakbang nung inyaktertem nem tenüngsang agütsüogo. "Nurse kati, onoki merara shibai raratsü, ni raratsü asoshi renema lir, ta ashiba angazüka ni kanga pelaa liasü. Tetsüba ya wara atema telangzüba ka masü. Yisu dak tamang yuang aser tulusang Tsüngremi nenok ajak kümzüka tokjang aser moajang," ta pai sarasademja ataba lemsatet. "Nüburttem ajangzüksü atema district ajak nungi Health & Family Welfare Department-i ochishia osang agütsükdaksüner. Senotsü osang agütsüba ajanga nüburttem ajangzükba kuli magütsür," ta NPCC-i ashi.

Deputy Chief Minister Y, Patton-i DHD nem ambulance agütsü

Dimapur, Aami/June 03 (TYO): District Task Force Dimapur ajanga mepishiba ama, Deputy Chief Minister Nagaland aser Home, Road & Bridges indang Minister incharge, Y. Patton aser par kibongi District Hospital Dimapur (DHD) nem ambulance tajung ka tenla agüja liasü. Iba ambulance meshitetba sentong ya June 3, 2021 nü Chief Medical Officer, Dimapur indang office kima agia liasü, kong DHD indang chaplain, Rev. Yhunlo Thong-i gari ya meshiteta sarasademtsü. Iba sentong nung o tatsüka jembiba mapang, "Tanü asenoki lungjemer COVID-19 tashidak wara den raraba mapang, District Task Force Dimapur ajanga küdang asüngdanga ama ni aser ozü kibongi tepela temaitsü ajemalua DHD nem ambulance ka tenla agütsür," ta ashi.

Iba ambulance ya teyari nungdaka alir ajaki senti takum kumzüka mapa nung amshitsü imlar, ta pai ashi. Y. Patton-isa doctor, nurse aser frontline worker temi anibelem mesasai meimchir asoshi pei takum bendanga agütsür tenzüka atema pelaba lemsatet. District Task Force Dimapur aser DHD nung nungdaka indang osang agütsüba atema pai Nodal Officer for Dimapur district, Y.Kikheto Sema IAS dang pelaba lemsatetepa liasü. Dimapur district nung COVID-19 tashidak kanga sashia lir, anungji ajak külemi inyaksüla, ta Patton-i ayongzük. Iba tashidak wara yagi asenok ajak dak kongshi, anungji ajak külemi lungjemer raratsü nungdak lir, ta pai ashi. Iba tashidak den raraba nung tashi itshitsüsa kija aser lokti

tentet balalai teyari agütsüba atema tenüngsang agütsüba mapang, "Iba yagi teimla tulu agütsür," ta Deputy Chief Minister-i ashi. Patton-iba ambulance indang jabi ya CMO Dimapur nem amokja liasü. District Task Force aser Team Dimapur tenung nung Y.Kikheto Sema, IAS ajanga Y. Patton dang pelaba ashi. Taoba küma Patton aser par kibongi Chennai nungi special train mezügnuba nung Dimapur-i meyipa shilanger nisung 1477 nem chiyongtsü agütsüba bilemteta jembiba mapang, Patton ya mapa agi sayuba nisung ka lir, ta Sema-i ashi. Iba sentong nung Deputy CMO Dimapur, Dr. Antoly Suu menden liasü aser CMO Dimapur, Dr. I. Moatemjen ajanga tepela ankep o jembia liasü

NPF-i CIHSR nung sen crore 30 intokba bushitsüngdangtsü akhang

Kohima, Aami/June 3 (TYO): Nagaland Angh office ajanga Naga People's Front Legislature Party (NPFLP)-i, CIHSR nung yipten 176 aketba makeshift COVID-19 Hospital ka amenoktsü atema sen crore 30 lemzüksüba, National Investigation Agency (NIA) nem bushitsüngdangdaksütsü atema khangogo. NPFLP otongdar Imkong L Imchen-i Brehostibarnü sangdong ka ajanga, private health institution, CIHSR nem sen crore 30 lemzüksüba ya nisung kari amokbanger inyakba PDA sorkar inyakyim rongnung ka lir. Principal Director H&FW Dr. Neikhrilie Khimiao-i ken o jangjashitsüba mapang CIHSR nung yipten 176 aketba mozüki ya Makeshift COVID-19 Hospital ka asütsü ta shiogo, ta ashi. NPFLP sangdong ajangsa, makeshift mozükitem ya yinya agi khen atema amenokba mozükitem

lir, aser iba amala mozüki ka nung sen crore 30 intokba ya Nagaland nungdang tang aliba sorkar kübok ataloker, ta ashi. Maneni NPFLP Legislature Party-i, Angh office ajanga iba ken o NIA nem bushitsüngdaksütsü khangogo. Inyakyim nung ochi mashi sendaka aliba ama reprangteter, kechiyong kisüjensü atema tender dena magütsü, ta party-isa ashi. NPFLP-i ashiba agi, district ajak aser state nung COVID-19 District Task Force lir, koba COVID dak sendakba maparentem achayangtsü atema amenok, ajisüka item loktitem nem senotsü teyari agütsüba kecha shisema mali. District Hospital, Community Health Centre, Primary Health Centre aser Sub Centre tem ajak sentoka toktsüogo, shidakbabo item centre tem ya COVID wara den raraba mapang yakbang nung nokdakertem lir.

NPFLP-isa, COVID-19 tashidak menar anogoshia timba timba küma aoer ajisüak item tesemtem nung local media tem nung nungdak makba ola adokba Expert Panel, High Powered Committee, State Disaster Management Authority, War-Room amala lokti tentettem dak alia nübu peria yoka mali, ta ashi. "Mozüki aser office tem shibanga lir aser sentong junga merenemi state ajunga mokdanga yua lir. Tatsü agi sorkari tebilemtsü bentettsü atema minyaker. Finance department, Treasury & Accounts aser Banking institution tembo shiba mali aser iba kuli ya ajaki angateter," ta NPF-i ashi. Iba amala mapang ka nung Nagaland nung aliba nüburttem Covid-19 tashidak agi asüba nungi jenboa toktsütsü atema NPFLP Legislature Party-i Nagaland Angh teyari meshitsü nungdaka aküm, ta kasa sangdong ajanga metetdaksü.

Mkg nung tanü nungi Hardware dokantem lapoktsü

Mkg, June 03 (TYO) : Mokochung town nung June 4 nungi tenzüka anepdang 6 ako nungi nikongdang 2:00 ako tashi jangotsü, amtsük, shi ango aser aonsutsütem aser shiruru chiyongtsütem ayokba den külemi kisüjensü mapatem nung nungdak ayokba hardware, electrical aser electronics dokantem aser gari totzü ayokdak ajak lapoktsü District Task Force-i telemtetba agiogo.

Ajisüaka, nisung ajaki Covid-19 tashidak wara menatetpa maotsü asoshi lateta yutsüba inyakyim ajak shitak beshitsüla aser pei mepu nung dang nungdakanügratemji alitsüla ta tanü sangdong ka nung Mokochung Deputy Commissioner, Wb.Limawabang Jamiri metetdaksüogo. Item dakji alaka mozü ayokdak, mozü kitem aser nisung ayipba hotel-tembo teti lapoka

alitsü melatsü aser ano hotel telong nung chiyongtsü memelaaka, alia kidangi bener aotsü aser chiyongtsü ki tonga bener otsüba mapatembo melatsü ta kasa sangdong ajangasa metetdaksüogo. Iba ozüng raksartembo Disaster Management Act, 2005 nung lateta aliba ama senchi den tepuokdak küm ana ayutsüsa temerenshi angutsü ta DC-isa metetdaksü.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



CTBA ajanga CHC Changtongya nem oset balala tenla agütsü



Dimapur, Aami/June 03 (TYO): Changtongya Town Baptist Arogo ajanga June 3, 2021 nü Community Health Center Changtongya nem oxygen cylinder pongu, oxygen regulator pongu den humidifier pongu aser mask aser wrench asem tenla agüja liasü.

Item osettem ya CTBA pastor, Rev. Temshi ajanga

Rorheu Peseyie SDO (C) Changtongya, Dr. Imtjungshi Aier SMO CHC Changtongya, Dr. Among MO aser Temjennungsang Jamir CHC Managing Committee Chairman nungertem lia amoktsü.

Tang tashidak wara agi alima tesem ajunga sünger lia aser nüngdakba mapang nisung takum kumzüksü

osettem mozüki nem agütsüba atema arogo dang pelar, ta Dr. Imtjungshi ajanga ashi.

Mozüki nung shirangertem anepaluba mapang amshitsü oset agütsüba asoshi Task Force tenüng nung Rorheu SDO (C) ajanga arogo dang pelaba lemsatepa liasü.

Ajidang masü lenla balala nung arogoi yaritepba atema pelaba lemsatep.

ANPSA Dimapur-i COVID-19 atema inyakertem nem teyari agütsü

Dimapur, Aami/June 3 (TYO): ANPSADimapur Unit den Chumukedima Sub-unit-i sangdong ka ajanga yakbang nung inyakertem dang parnok mapa tajung asoshi kanga pelaba lemsatepogo.

State nung Covid-19 tashidak poktetli nungi yakbang nung inyakertemi parnok taküm bendanga agüja inyakba atema parnok nukshia reprangtsü aser parnok nem akhümtsüba agütsütsü langa lir. Lokti asoshi kanga tasü ita

mapa tajung inyakba ajanga Corona Virus agi state nung aliba nürburtem amokmerenba nungi anitettsü atema longjemer inyaktsü maneni ajungmesor, ta kasa sangdong ajanga lemsatep.

Kasa mapang nung tenüngsang agütsüba temaitsü ka ama aser teyari agütsü meyong süa ANPSA Dimapur-i, Y. Kikheto Sema, IAS Nodal Officer, Covid-19 Activities aser Albert Ezung DMC CEO ajanga PPE Suite

den Mask, Gloves aser Hand sanitizer tenla agütsüogo.

Iba teyari tilaka ajanga yakbang nungi inyaker tasütait adianutem aser lokti tentet balala nem teyari agütsütsü imlaba lemsatep den, osetsüt teyari tera agütsüba dak alia nürburtem ajangzüksü asoshi ketdangsürtem nem shisatsü aser nübu agi teyari agütsütsü mulunga aliba, ANPSA DMP tir Dr. Andrew Ahoto Sema-i sangdong ka ajanga lemsatepogo.

NACWR-i tashiyim inyakyim aitsü

Dimapur, Aami/June 3 (TYO): March ita Dimapur kübok nüngtugu school ka indang Principal kati arishi küm pezü tain tetsü chanu ka dak mejungi benshiba, Nagaland Alliance for Children and Women's Right (NACWR)-i aitsüogo.

School Principal, shibai par school nung tanurtem kümzüka toktsütsü atema inyaktsü nüngdaker, pai meyiper iba

amala inyakyim nung shilem agiba ya shisadangsü makoker aser iba amala inyakyim anema nürburtemi nokdaksüla aser aitsütsü nüngdaker, ta NACWR-isa ashi.

Kasa mapang nung Sematilla nung alir kibong kati May 29 nü kidang alir tebur chanu ka rishikangshia amshiba angazüka NACWR kanga aoksaba lemsatepogo. Tebur chanusang shiba arishi küm

teku dang aser kidang teyariteper ka liasü, pa dak apuani nati teka sangshia rishikangshia liasü.

Asenok aliba lokti nung tanurtem tekümzükba makai kümogo, ta shia NACWR-i, temzüng benokba ketdangsürtem dang temzüng ozüng dak ajemdaker aibelenertem tem nem temerenshi tesashi agütsütsü khangogo.



Security Forces temi June 02, 2021 nü Jharnapani Village, Dimapur nung nisung toku den truck pezü pua liasü. Item gari nungya ozüng alema shibelena bener aruba Burma Teak tons 82 liasü, koba sen lakh 95.2 jenjang alitsü. Pua aliba nisung den oset ya Range Forest Officials, Dimapur nem agütsüogo.

Dimapur police-i ozüng raksartem apu

Dimapur, Aami/June 3 (TYO): Dimapur Police-i June 1, 2021 nü Murgipatti tesem nung (NNC N/A) zügsem ka ozüng alema sen sarua aliba mapang puogo. Aija alisang ya arishi küm 36 tain Kawoto Aye ta jangaogo. Pa ket nungi NPGN (N/A) indang demand slip ana, mobile phone 2 aser scooter ka ta ngutetogo aser East PS nung pa anema ken o ka benokogo.

Kasa mapang nung June 2 nü Dimapur Police-i, Dimapur Rail Station tesem nung arishi küm 31 tain nisung ka tenüng agi Inato Kiba puogo. Pai .32

calibre pistol ka den magazine (Country-made) ka bener aliba atema apu. Iba dak sendakba nung pa anema East PS nung ken o ka benokogo.

Maneni Dimapur Police-isa, June 3 nü Jalukie Police teyari nung Duncan Basti kiyong nungi auyar aoba Royal Enfield Bikes ana ngutetogo. Iba dak sendakba nung Mhabemo (27 yrs.), Ephyothung Mozhui (30 yrs.) aser Longshibemo (30 yrs.)

puogo aser parnok anema West PS nung ken o ka benokogo, ta Addl. Dy. Commissioner of Police/PRO sangdong ka ajanga metetdaksü.

Covid agi asür mang kinunger nem agütsütsü

Mkg.June 03 (TYO) : Covid mozü kidang asürtem mang mozü kidang inyakertemi jungjunga renemer kinungertem nem agütsütsü, ajisüaka mang bushir melira SDRF purtemi anepalua bener oa endoktsü ta tanü sangdong ka nung Mokokchung DC Wb.Limawabang Jamiri metetdaksüogo.

Ano, Covid tashidak agi

shiranger pei kidang süadokra aser iba mangji kinungertemi bener oa aremtsübaji anepalu mesütetra, iba mangjia kinungertem den SDRF purtemi yaritepa remtsütsü ta kasa sangdong nungsa metetdaksü.

Item mapatem asoshi nüngdakba osetsüset ajak Medical department aser District Task Force-i agütsütsü ta DC-baisa metetdaksüogo.

Mokokchung District Jail nung tepuokertem nem vaccine agütsü



Dimapur, Aami/June 3 (TYO): Chief Medical officers office sangdong ka ajanga, June 3 nü District Jail Mokokchung nung tepuokertem nem vaccine agütsüba sentong ka ayongzüka katsüba metetdaksüogo.

Medical Officer, Ungma PHC Dr. Shalong aser staff

temi achaayanga tepuokertem nem vaccine agütsüogo. Iba sentong kübok tepuoker 40 aser yakbang nung inyaker 26 nem vaccine agütsüogo. Dy. Superintendent L. Bumeng Khiam aser District jail Mokokchung staff temi iba sentong asadanga liasü.

MOKOKCHUNG DISTRICT TASK FORCE COVID-19

FREE AMBULANCE SERVICE FOR COVID-19 RELATED CASES

(An Initiative of Mokokchung District Administration & Mokokchung Police)

Services will be exclusively for

- From Home to Flu Clinic for high risk contacts
- From Home to Covid-19 Hospital
- From Covid-19 Hospital to Home
- From Covid Care Centre to Home

Contact helpline Number

+91 9362 561926

*For the initial phase, the free services will cover only Mokokchung Municipal Area and adjoining places.



Karbi Peace Accord taruba hopta sign asütsü: Himanta



Himanta Biswa Sarma

New Delhi, Aami/June 3 (Agencies): Assam Chief Minister Himanta Biswa Sarma-i, Karbi Peace Accord taruba hopta sign asütsü akok ta metetdaksüogo.

"Ken o dak sendaka aliba teloktem den tang ken o tembang jembishinüdar. Karbi Peace Accord taruba hopta sign asütsü akok," ta Assam CM Himanta Biswa Sarma-i ashi.

Union Home Secretary aser Intelligence Bureau

ketdangsürtem den iba ken o sensak asemtsü atema new Delhi semdangba mapang Assam CM Himanta Biswa Sarma-i iba osang metetdaksü.

"Ni Home Secretary aser IB ketdangsürtem den Karbi Accord sign asütsü atema senden mena liasü," ta New Delhi nung osang benertem den sensaksemba mapang CM Himanta Biswa Sarma-i ashi.

"Assam sorkari iba accord nung sign asütsü atema temelaba agütsüogo," ta CM Sarma-isa shisem.

Karbi nunger telungpurtem shirnok February ita bendanga agütsüogo, parnok den Centre sorkar aser Assam sorkari tenanzüktepba yanglutsü.

Kasa mapang nung Union Home Minister Amit Shah-i July ita Shillong, Meghalaya semdangtsü imlar, ta Sarma-i Brehostibarnü New Delhi nung metetdaksü.

Home Minister Amit Shah-i anogo ana atema Shillong semdangtsü.

Shillong semdangba mapang Shah-i North East state ti prongla nungi Chief Ministers tem den senden amentsü.

"Home Minister Amit Shah-i July ita Meghalaya semdangtsü akok. Pa Shillong nung anogo ana mungzüksü. Ajisüaka ken o ano tembanga merenem," ta CM-i ashi.

Home Minister Amit Shah aser Northeast State Chief Minister tem senden nung iba tesem dak sendakba ken o balala benoka sensak asemtsü.

"Home Minister Amit Shah aser Chief Minister tem senden amenba mapang, temsepba mozü shibelenba, North East state tem tsüingda arrtsü nung mangatettep aliba amala ken o aika benoka sensak asemtsü," ta Assam CM Himanta Biswa Sarma-i metetdaksü.

Arunachal nung Covid-19 tashidak menar 28,018 jungogo

Itanagar, Aami/June 3 (Agencies): Brehostibarnü nisung 376 dak Covid-19 tashidak potetba sülen Arunachal Pradesh nung tashidak menar 28,018 jungogo, ta health department ketdangsür kati ashi.

Taoba anogo ana tsüingda nisung ana asüba sülen state nung COVID-19 tashidak agi asür 118 jungogo, ta State Surveillance Officer (SSO) Dr Lobsang Jampa-i ashi.

Capital Complex nungi arishi küm 56 tain tetsür ka Dedicated Covid Hospital (DCH) Chimpunung Hombarnü acute respiratory distress syndrome agi asü. Ano Lower Siang nungi arishi küm 51 tain tetsür ka East Siang district kübok DCH Pasighat nung Covid Pneumonia agi Bodhbarnü süogo, ta ketdangsüri ashi.

Capital Complex region nung nisung 82 dak tashidak potetogo aser Tawang (51), Lower Subansiri (36), Namsai, Changlang aser West Kameng nungi 28 (each), Lohit (19), Leparada (18), East Kameng

(16) aser Upper Siang nung nisung 12 dak Covid tashidak potetogo.

Maneni Upper Subansiri nung nisung 9, Pakke Kessang aser Lower Dibang Valley nung ti-i, East Siang nungi 7, Papumpare 6, Anjaw aser Longding nung pezüzü, West Siang, Tirap, Kra Daadi, Kamle aser Dibang Valley nung anana aser Kurung Kumey aser Shi-Yomi district nung kaka dak tashidak potetogo, ta SSO-i ashi.

Tang tashidak potetertem rongnung nisung 360 rapid antigen tests ajanga potet aser RT-PCR ajanga 12 aser TrueNat ajanga 4 potetogo, ta ketdangsüri ashiba den nisung 135 dak Covid-19 tashidak keta aliba temaitsü sayudar, ta ashi.

Arunachal Pradesh nung tang nisung 3,817 Covid-19 tashidak agi tonger temang anepaludar.

Bodhbarnü nisung 329 anepba sülen state nung tang tashi nung nisung 24,083 anepogo.

COVID-19 recovery rate 85.95 per cent nung lir aser

active percentage 13.62 aser positivity rate 5.23 per cent nung lir, ta Jampa-i ashi.

Capital Complex Region kübok Itanagar, Naharlagun, Nirjuli aser Banderdewa tesemtem lir aser item tesemtem nung tashidak menar 709 lir. Iba tesem sülen Tawang (436), Changlang (352), Lower Subansiri (306), Namsai (298), Lower Dibang Valley (235), West Kameng (225) aser Lohit (201) nung tashidak menar alir timba lir.

State nung tang tashi nung sample 5,99,605 tendangogo, koba Bodhbarnü sample 7,181 tendangba densema lir, ta Jampa-i ashi.

Kasa mapang nung state immunisation officer Dr Dimong Padung-i ashiba agi, January nungi tenzüka tang tashi nung nisung 3,51,155 nem Covid vaccine agütsüogo.

Dr Padung-isa, June 2 nü tashi nung state nung vaccines 1,56,580 anunga liasü, kong Centre-i agütsüba vaccine dose 1,28,390 aser state sorkari Serum Institute nungi alizükba dose 28,190 densema lir, ta ashi.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, Itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. **Time: 7 AM - 3 PM -Yours sincerely - O. Lotha, Add: Purana Bazar**



India's International Bank

Regional Office, Jorhat,

Crystal Enclave, Seuni Ali, Borpool, A T Road, Jorhat-785001, (Assam)

Bank of Baroda invites offers from the owners/Power of Attorney Holders of premises with the area of approx. 1600 (+/- 25%) sq ft. alongwith space for ATM for shifting of the Circular Road branch at Dimapur with all facilities including adequate power. The intending offers shall submit their offers in two separate sealed cover super scribed Technical bid and Price bid to The Assistant General Manager, Bank of Baroda, Jorhat Region, Crystal Enclave Seuni Ali Borpool Jorhat-785001 on or before 24.06.2021. Priority would be given to the premises belonging to Public Sector Units/Govt. Department. For details please log in on tender section of our website www.bankofbaroda.com

The Bank reserves the right to accept or reject any offer without assigning reasons thereof.

Place :- Jorhat

Date :- 04.06.2021

Sd/- Assistant General Manager
Jorhat Region

Tetsür, tanur aser teburtem sota ayuba ya tim masü: Inquiry panel

Agartala, Aami/June 3 (Agencies): April 26 aonung West Tripura DM (District Magistrate)-i Agartala nung kiyimba benjung ayongzüka amunga tesem ana meita aoba asadanga high-powered committee-i, tetsür, tanur aser teburtem sota ayuba ya tim masü ta Tripura High Court dang shiogo.

"Report ajanga, tetsür, tanur aser teburtem ghonda ana tashi police station nung sota ayuba ya nüngdaka makaba inyakyim ka aser tim masü, ta shiogo. Iba ya süoki ia agütsüba ken o ka," ta Tripura High Court-i ashi.

Taoba West Tripura district magistrate Sailesh Kumar Yadav anema benokba ken o angadanga mapang Tripura High Court-i iba olen lemsatop, aser inquiry committee dang iba ken o maneni bushitsüingdangtsü tetuyuba agütsüogo.

Inquiry committee-i May 13 nü parnok indang report agütsüba sülen Chief Justice AA Kureshi aser Justice Arindam Lodh na indang division bench kati iba ken o angadanga liasü.

State aser Public Interest Litigation (PIL) ka densema petitioners asem indang counsel tenüng nung okatsür Siddhartha Shankar-i ken o benokba angadanga sülen Chief Justice-i, committee dang June 22 nü ano iba ken o mangadang tsüingda osang talila kar agütsütsü tetuyuba agütsüogo.

Maneni Chief Justice-isa, inquiry committee-i benokba report nung, tetsür aser tanur densema kiyimba benjung nung adenertem shiba tetuyuba nung sota ayu, iba indang osang agüja mali, ta ashi.

"Okadak ken o ano tanaben mangadang tsüingda Inquiry Committee nem ken o ano bushitsüingdangdakjang aser osang talila kanga junga alepbanger benokdakjang," ta Chief Justice-i ashi.

Advocate general SS Dey-i court dang, tang tensa apir Sailesh Kumar Yadav tanaben West Tripura district-i meyipa yoktsü mepeshia asüingdangogo. Ajisüaka court-i temelaba magütsü, kechiyong ken o tang bushitsüingdang tesüdak lir.

Tripura nung BJP-IPFT züngsemtem amak

Agartala, Aami/June 3 (Agencies): Tripura, Khowai district kübok Teliamura sub-division nung Mungiakami tesem nung BJP-IPFT alliance nungi block advisory committee (BAC) mendenbuba aser züngsemtem, TIPRA Motha züngsemtemi amak. Bodhbarnü lanur telok ka Mungiakami nung block advisory committee mendenbuba Sunil Debbarma indang office-i ai, aser pa dang official paper ka nung sign asütsü asüingdang.

Debbarma-i mezüngbo iba paper nung sign asütsü memulung, ajisüaka lanurtemi pa nem kangshia sign südaksü, ta source kari ashi.

Iba sülen lanurtem mendenbuba office takdang nungi adok aser BAC züngsemtem aser BJP-IPFT alliance kübok inyakerkem dak azük, shirnok block office kima liasü.

Iba osang angazükba sülen BAC vice-chairman Bikash Debbarma, iba tesemi aritepa ao.

Iba tatalokba nung yirurtem ajak temang anepalutsü atema Teliamura mozüki-i anir ao. Yirur alirtem rongnung Ranjit Debbarma tekolak yirua liasü.

BAC mendenbuba aser vice-chairman nati, BAC züngsemtem dak azükertem ya TIPRA pusemertem lir ta ashi.

Kasa mapang nung Tripura

forest minister Mevar Kumar Jamatia aser MLA Kalyani Roy nata osang angazükba sülen iba tesemi aritepa ao.

Tenati Teliamura mozüki semdanga yirur alirtem jenjang asadanga liasü.

Jamatia aser Roy nati iba tatalokba aitsüogo aser aibelenertem anema temzüng ozüng dak ajemdaker jenjang tapet agütsü ta shiogo.

Maneni osang ajanga ashiba agi, TIPRA Motha züngsemtemi Teliamura block kübok South Pulipur, Hadrai, Duski autonomous district council (ADC) yimtsüingtem nunga timtem agüja liasü.

District council, executive züngsem Kamal Kalai-i, Mungiakami tesem semdang aser ken o bushitsüingdanga liasü.

Kalai-i ashiba agi, Tripura kübok tenem nung aliba kintem nungi nüburtem aika Covid-19 wara pokteter aliba ajanga sensak tia nung lir aser TIPRA pusemertem, tenüngdakbapurtem nem teyari agütsütsü atema block mendenbuba nungi sign agütsü ao.

Paisa, mendenbubai paper nung sign mesütsü aser ibayongji iba lendong ya atalak, ta ashiba den par party TIPRA Motha nungia nisung aika yiruo.

Ajisüaka par party kübok inyakerkem aitsüba pai magizük.



Guwahati : Assam kübok Nagaon Paper Mill aser Cachar Paper Mill June 30 nü auction asütsü telemtetba agiogo. Bidding inyakyim atema official osang sangdongogo aser auction ya online nung mtsecommerce.com ajanga agütsü ta metetdaksüogo. Reserve jenjang sen crore 1,139 aser Earnest Money Deposit (EMD) sen crore 55 aser minimum increment bid sen crore 1 asütsü latettsüogo.



TIR YIMYIM

YIMOBILEM (EDITORIAL)

DIMAPUR ROGONÜ, AAMI (JUNE) 04, 2021

Shiranga mapa inyaker

Taküm nung aiben nisung aika shiranga mapai aoba ajuruogo. Ibaji onüa aoerba masü saka mapai moura majungtsü, kechiyong kidang kinungertem chiyongtsü makatsü. Iba tia nung alir nübertemji asenok lir. Iba ama nübertemji tashidak wara nungi jenbuttsü anepalutsür asüyonga, ita junga kecha meinyakdaksü shibanger ayu nung majungtsü, anungji Covid-19 tashidak wara nokdangtsü atema mokdangba (lockdown) sentong ya mapa kecha meinyaktsüsa shibangba "total lockdown" masü saka mapa meinyakba agi chiyongtsü maka aküm ta masü saka mapabo inyaktetsüsa "partial lockdown" asütsüla. Atangji, tanga chiyongtsü ayokba dokan-tembo lapokdaksür aser alu aser kisüjensü mapatemo inyakttsü melar. Ajisüaka, timtem kaji kisüjensü dang nungdakba oset ayokba 'hardwares' dokantemo melapokdaksür. Iba jagi kisüjensü mapa inyakttsü melaa aliyonga oset makaba agi mapa meinyaktet nisung aika ita junga kazüdoker. Ibaji kibong ka asoshi dang masü saka yimkong asoshi rongsentsütsü takoksa lir. Iba takoksa aser nungdakji reprangteta Mokochung town nungbo tanü nungi nisung aser shirurtem chiyongtsü ayokba dokantem den külemi anepdang 6:00 ako nungi nikongdang 2:00 ako tashi kisüjensü dang agiba osettem 'hardwares' aser 'electrical' osettem ayokba dokan-tem lapoktsü temelaba agütsüogo. Atangji, item dokan-tem nungji nungdak osettem alidang akhidang ama nisungtem nungtepa masü saka menungtepi nisung ka o ka na tsüngda tepila lia atateptsüla. Iba jagi tashidakbo menatepa mao saka asen nungdakbo atalok ta tanem tanemi Covid tongpang ya koka aotsü. Tang ama nübertem kechaleni mao aser asentzü sendoka mapaa kecha meinyak ta kidang amongba ya rongsentsütsü takoksa dang masü saka temang asoshia lendong lir. Asenok aikati temang nungi asentzü sendoktsü kisüng bilemabo exercise magir saka anogo shia mapa inyakdang temang nung tashi (calories) talila aliba rongdoker aser asentzü sentoker, iba jagi asenok temang ayangayanga aser pongbapongbaa alir. Aji oda, tang ama akhi alu mapa meinyaki kidang chiyonga amongba ajanga, ashiko, nisung aika temang nung diabetes, blood Pressure aser temulungjang tashidak ama agi timtem ajurur tatem nungbo Covid agi sür alitsüa akok. Nisung ya kecha meinyaki kazüba taküm masü saka arakzüa aser senzüa alitsüba taküm lir, anungji kodang temanga junga marakzü aser kiküma alema mao, kidang kidang dang moka kazüdir, kecha tamajung ka matalokyonga temulungjang mangmanga kümadoktsü aser tapu tapu bilema shisabolu tenzütsü. Itemji kodang temulungjang nungi satoka moudaktsü lir tashidak akümstsü. Anungji, item ajakji bilemdanga state aser district jenjang nung telemtetba agirtemi telemtetba agitsüla. Nisung taküm anema alitsü asoshi, shitakbabo, mokdang kazüba dang nungibo temulung sadoksadoka pelaa alibajisa tajungba. Aji oda, nisung ka pelashishia kimalen mapa inyaka senzüba dang nungibo shisaboluseta kechaleni moi kidang kazüba nisungba dakji tama tashidak atemtsü. Iba jagi tanü putu nungbo government sentong nunga nübertem pelaa lidaktsütsü asoshi dena bilema yanglur, kechiyong nübertem pelaa alibajiang kin ka asoshi rongsen tulutiba ta züngshir. Item ajakji temulung nung yur, asen lima nunga tang mokdanga aliba ya tanem-tanemi chioktsü sentong yanglutsüba kanga tenüngdaksü kümogo. Tangar mokdangji ta ser asenoka mokdangtsü ta masü mesüra tangar memokdangji asenoka mokdangtsü nungdak mali ta masü, tensa tia ajak nung asenoka asen lima aser nübertem rongsen jenjang dak apet telemtetba agitsüba kanga nungdaker. Aji oda, asenokbo tashidak memenateptsüsa kanga kümdanga alitsü saka mapabo inyakttsü ta asüba inyakyim ka bushitsüla. Asenokbo tangar jilu ajizüka mashimashi senzütsü ta masü, kechiyong tangarbo shirangyonga mozü kidang yipten teperi lir aser mozü alitsüa sen teperi lir saka asenokbo yamaji masü. Aji oda, tangar kidang amongerji ta ser asenok ita junga kidang amongtsülaa masü, kechiyong tangarbo mapai maoyonga chiyongtsüba angutsü aser kidanga exercise peria agir, saka asenok mapai kenü mao nung asüngnep kinunger chiyongtsü makatsü aser temanga shirangadoktsü. Lokti mesentepiyonga kecha masü, benjong malibajia tajangzük dang aser süoshi ayokba dokantem melapokbajia, atangji tayokertembo takoksa saka alitsü purtem asoshibo sen meindoki rezünga ayur dang asütsü. Item ajakji shisadanga tashidaka nokdangtet aser nübertema pelashishia pei mapabo methitemi inyak ta asütsüsa telemtetba agirtemi telemtetba shitak agia nübertem anitsüla.

OLEMSABANG

TANÜ AROGOTEM NUNG KIYIMBA YIMYA TEBILEMSTÜ

~ Amenla Mar

(Yashi adok nungi...)

1. Temeshi kiyimbaji tenla kidang dang agitsü ta ABAM telemtetba lir. Iba telemtetbaji ajaki tashi anga inyakttsüla. Kari Tenlaki toktsür tanga tesem nung sadi agitsüsa kümra Pastor aser Arogoi kiyemer dentangateteba nung tesayuba tajung agia inyakttsüla saka pei pei mulungba nung masü Tenlaki nung agitsüla.
2. Arogo nung pastorji ministerial licence akabasüra tanga Arogo nungi pastor anir arua magitsü, lim Arogo Sannükeri sati kuli agütsütsüba tentetji tajungtiba.
3. Engagement agiba mapang nung, benjung tulu agitepba masü, saka arogo office nung mesüra tenla kidang nisung telatet ka arua agütsütsüla. Iba ama yimya tajung beshiba ya ABAM kübok Arogotem aika nung beshia arudagi. Saka liromedema amshiba mangur.
4. Tenla ki naro inokba nung Arogoi tetuyuba kar agütsütsü tim, aji mesüra ki naro tali inoker shilem agir atema mesadem timtem agütsütsü ana nung lir. Pei bendanger benjong-bentsüama mesang-meyonga inokba ajanga tekülem nung Tsüngrem akümstsüba tetushi tekülemba samadaksür.
5. Pre-marital counseling hapta kabosa jilia agütsütsüla, Pre-marital aser post-marital counselling/class ya kanga nungdak, kechiaser tanela, sobaliba kibong aser apuani o Arogo tesendaktep ajak asoshi terenemba mapangji iba mapang ya lir. Arogo aika nung Bible study kiyimla aser kiyimsang den agia arudagi saka Arogo tiemba ka nung ken dang sarasademer süidaktsüba angur. Ibai teperi masü.
6. Tetsürtemi teberem sü, asen Aotsür national sü agir sadiba ajungshitsü junger. Tamalen Watsü Mungdangi iba ama pei süoshi agitsü telemtetba tajung agiba belemteter. Item ama mapa tajung tu tanaben meyiba beshi nung koda!?
7. Shijeb agütsüba yimya ya melenshitsü Arogo, yimden, watsü aser senden balalai shisadanger lemanng tajungba ka sayutet nung tapet asütsü südi.
8. Ao Mungdangi (ABAM) kibong tasen akümba dak sendakteba koba telemtetba latetja ali iba nung Arogotem ajak uniform sa beshitsü nungdak. Tat. agi., Lar labonger masütsüla, Arogo nung züngsem tajung aliba asütsüla, asüngteta aliba taküm, etc etc. küm tatem mungdang generali tatsü talang ajak jembiteper lokti agizüka lemtet asü nung iba nung maibeleni beshitsü junger. Mungdang lemtetji ajak asoshi ta angatetdi.
9. Aoli Arogo kar nungbo talisa Arogo tulu nung satitsü anogo Arogoi züngzüker kenu yongi kibong pongu/terok külemi Arogoi sadija arudagi. Iba ajanga lalushibongba, lokti nem timtem agütsüba ano sentsü atsüba aika nungi kümzüker. Arogokar nungbo Arogoi satitsü condition agütsübanung shiri agizükteta saditer, Temeshi kulizung tajung agizükba den Arogoi süngo tajung renemja tarur ajak peridakja chia jemdaksür. Iba ya kanga dang mera taket yimli tajung maparen lir. Iba amalainyakyim tajung yabo yim saseb nung lim Arogo dak apet beshi nung koda!?
10. Ao Arogotemkar nung satidang Deacon board nungi nisung ka /ana shimteta sadi benjong dak sendakba Arogo telemtetba kechi inyakttsüla aser kechi meinyakttsüla (do's and don't) zülur agütsür. Iba ozüng nung aibelenra certificate meyiba meshiadoktsü ta sign südaksür. Iba temelaba aser tangatetep nung ajemdaker kiyer benjong agibaji kanga mera taket tenükshitsü aser mangatebtep aika nungi kümzüker.
11. Sadi anogo nung dang masü saka tanga mapang nung tamanger shia nem aeir ka aser asanger ka koda asüngteta lia Laishiba melaba ama Tsüngrem O dak ajemdaker kibong tasen akümstsü, Pastor mesüra tapet nisungi Laishiba tesayuba tajung mapang apir angateta sayutsüngba ajanga aika ajangzüktsü.

Tatensa, tanü putu tendak bendang li tesem balala nung prokshia alitsüsa akümer. Iba ama tensa nung tebilemstü ajurubaji mungdang ajanga Arogoikoba marriage certificate agütsü ibai legal maparen aika nung magir. Tat. agi, passport yangluba aser renewal ama, visa yangluba, foreign lima nung mapa inyakttsü temelaba meshibamaparen nung Arogomarrriage certificate agibo mabensatsür, anungji court nung marriage registration asütsüsa akümer. Akok nungbo tarutsü lanurtem asoshi Arogoi agütsüba certificatejia legally agizüktetsüsa maparen kar bushitetsü, Mungdang ajanga 'Marriage Registrar' jenjang nung arogo Pastorji yutsütsüsa tapet asütsü asü masü, Indian Christian Marriage Act, 1872 den medemdanga, asenok tendak apettsü asü? takhen arok aroka shisadanger lemanng bushitsü nungdak ta bilemer.

Mezüng sadi-ji Tsüngremi Adam aser Eva nungi tenzük (Lipok 2:22). Anungji dang Lai tesayubaji Tsüngremi kechi lungjemdaksü aji nisungi tepiladaksü (Mat. 19:6) ta shia lir. Saka sadi benjung yabo meimcher yimya tentet ka dang, iba nung nungdakbatem bendenloktsü aser tajangzük makabatem indoktsü ajakji meimchier dak tashi lir. Kibong ka tenteta aobaji; Lokti ka, Arogo ka aser alima ka raloka aor. Kibong ka ajanga lokti asoshi tajangzük aser teraksa bener arutsür. Anungji amangbabur kibong tasen shia Laishiba O nung amenloker sadi kuli agiba yimya tajung agia kibong tenzükra akümüli tepiyong ner kibong temoatsü asütsü. Iba oset azünger ajak Tsüngremi tangatetba tasen agüjangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kansas nung pastor Hett aser par jala na gari lendong nung asü



Arrshi küm 39 Pastor, Phillip Hett den par jala ana- Abigail (10) aser Jillian (13) nunger külemi tangokba noksa ka yangi angur. May 30, 2021 nü Pastor Hett aser par jala Abigail nabo gari lendong ka nung süogo.

June 03, 2021: Amongnü (May 30) Kansas nung Pastor Phillip Hett aser par jala, arrshi küm 10 Abigail na gari lendong nung asüba sülen kinüngertem aser Arogoi mangyimdar; gari lendong nungjagi lar jala arrshi küm 13, Jillian bo kümzüük.

Kansas Highway Patrol-i ashiba agi, Amongnü nikongdang 1:30 ako meta Salina nungi mile 8 shi pilar Interstate highway 135 nung gari lendong nungji pastor aser par jala tanutsüla na asü.

Iba tatalokba bushisüngdangertemi ashiba agi, arrshi küm 24, Christopher Giroux-i aniba gari pickup truck aser pastor Hett-i aniba pickup truck na tsüktep. Pastor jala Jillian-a iba lendong nung mejungi yirua hospital nung yaridar.

Pastor Hett ya Bethany yimdak mission mapa teinyakdak liasü; iba mission ya Evangelical Lutheran Churches of America kübok lir.

Bethany yimdak CEO, Eris Erickson-i yimdaklirtem dang pastor Hett'er kibong atema sarasademdaksüner, ta mepishia metetdaksü.

Erickson-i sangdong ka ajanga, "Bethany yimdak alirtem kanga aoksaogo aser pastor asüba atema mangyimer. Par jala Abigail asüba atema-onoki mangyimer. Phillip ya nisung tajung ka, tembar tajung ka aser pastor tajung ka liasü. Onok mission kübok tanela tsütsü len sayurji pa liasü. Onok mangyim jashi mapang nung onoki pasa bushia liasü, saka tangbo pa mali," ta metetdaksü.

"Pai onok dang tammang aser temeim tesayuba agüja liasü, aser ibaji ajanga tang onoki longjemmer pa atema mangyimer. Onoki par kibong aser par jala Jillian atema sarasademtsür. Onokisa kasa lendong nung adener (Christopher) atema-a sarasademtsür," ta paisa ashi.

"Timtem mapang nung pai yimdaklirtem aser külem tenzükertem yaria aruogo. Pa dak temeim aser taochi alibaji kecha den-a masadantet. Pai sayutsüngiba mapang nung pai pa taküm nung ajangshibatem lemsatet aser ibaji ajanga ajaki pei taküm den medemdanga temoatsü angu. Pa ya Laishir tajung ka liasü. Laishiba teratet tejangja metetsü atema ni pa aiben ajuru. Pa den office nung ghonda ka shi dang amen nunga pa dang nungi loktiliba, yimteneren aser alima nung tatalokbatem aika angazüka liasü," ta paisa ashi.

"Timtem toudhi mapang nunga pai nüktzü anendaksür peladaksü aser ajak jungadoktsü ta onok melung sünepja liasü," ta Erickson-i ashi.

Pastor Phillip Hett'er kibong yarinertemi "Bethany Home Association" ajanga tongtepratepa yaritsü akok, ta paisa metetdaksü.

ICC-i Coronavirus wara mapang India nung pastor 40 yariogo

June 03, 2021: Tang India linük nung coronavirus wara taneben prokba mapang asen adianutem aika wara agi kongshir timtemer, talisa yimtsüngtem nung tenzükter pastor tem iba wara agi mejungi kongshio, ta International Christian Concern (ICC)-i metetdaksü.

India nung wara prokba nokdangtsü atema Tenla kitem shibangtsüba agi ter shilem aser tenla balala Arogo senpongi maiter, ibayongji pastor kibongtem aika timtemdar.

Taoba ita International Christian Concern-i Khristantem dang India nung pastor tem yaritsü atema tenla agüjang, ta mepishia liasü.

Ajioda India nung local partners teyari ajanga ICC-i India kübok Telangana, Andhra Pradesh aser Karnataka state tem nung Arogo tasen tenzüksür pastor 40 nem teyari agütsüogo.

May ita tetenzüklen nungi Telangana state sorkari anepdang 6:00 ako nungi anepdang 10:00 ako tashi sensotem kimai ayazüka aotsü memelar. Ajisüaka May 29, 2021 nü pastor temi distribution centre tashi oteta ICC nungi teyari nguogo.

ICC den jembidang NorthernTelangana nung Pastor Gideon-i, par kibong atema teyari agizüktsü atema pa tetsüng mejungi liaka pa mile 40 tashi distribution centre-i ao, ta metetdaksü.

Pastor Gideon-i, "Ni timtem agia iba tesem yagi maru asübo ozü kibong chiyungtsü makala. Iba teyari atema nenok dang pelar. Iba teyari ya ni aser ozü kibongi kanga nüngdaka liasü," ta ashi.

Teyari angur pastor tem rongnung ka, Pastor G. John-i, coronavirus wara malidang kibong mesütsü atema Arogo

dangi aruba ter shilem nung dang metaloka liasü, ajisüaka par Arogo Tenla ki küm ka dak tema shibangba ajanga par kibong mesütsü atema sen tangulen lenmang maliasü, ta metetdaksü.

ICC dang pelaba lemsatetepa Pastor Ahir-i, "Pastor tem atema senotsü lenmangji Arogo züngsemtem ajanga dang angur, saka Tenla ki mapang talangka shibangba ajanga pastor tem timtema liasü. ICC-i meyari asübo pastor tem aika aya-tzüria tia nung lila," ta ashi.

"India nung asen adianutem atema sarasademdaksüner. Tang ama mapang ka nung Arogo tashi aittsü atema s a r a s a d e m d a k t s ü n e r. Coronavirus agi kongshir ajak Yisu tenüng nung aneptsü aser nüngdakba mapang nung teimla angutsü atema sarasademdaksüner," ta ICC-i mepishia metetdaksü.

ANOGO ABEN TSÜNGREM DEN

Tenzüktsü anunger

Ne nüburi na raraba anogo nung peisasa mulungteta adoktsü. T. Ken 110:3

Asentenshiba tamaittsü kaji, koba mapang nung Tsüngrem ain nung Pa nübur dangi arur pa tenzükba mapa nung parnok taküm agütsütsü anungbaji lir. Arogo aika nung Tsüngrem mapa nung bendanga agütsür nübu agi anünga lir. Pa talangzükba mapa nung yaritepa inyaktsü temulunger nübu mangur. Tsüngrem tenangzükba mapa mangashir aika dang lir aser Khristantem item mission wadang jagi aotsü ayimtener. Asenoki nüngdakbaji temulunger aika adoktsü mepishitsüba masü saka Tsüngrem ain yokang ta mepishitsüba lir. Kodang Tsüngrem Pa ain nung nübur dangi arudir pa mapa asoshi temulunger nübu aser teyari agi anünga malitsü!

Tanü Khristan aikati aser arogo aika nung missionji mezüngbuba mekümdaksür. Ibai kechiba süra asenoki asen ajaba lemanngji samadok. Asenoki kotaki aotsü temsüa akümtsü atema dangbo mekümsük. Tsüngremi asenok samaa aliba lima kümzüktsü asoshi Pa den külemi inyaktsü asoshi kümzük. Asenok Pa den tesendaktep akaba ajanga Pa mission asenoki inyaktsü akok.

Tsüngrem ain ajanga dang asenok pei atema dang bilemba nungi anitettsü akok aser mission tsütsüi meyipdaksütsü akok. Parnok aruba lenmangji ibaji dang lir. Pa ain asenok ajanga sayutsü asoshi asenok dak tagizükba temulungjang akatsü nüngdaker. Isaia den, "Ni yangi lir, ni yokang!" ta shitettsüsa ne mulungjang Tsüngrem meimba agi sünga lir ma ?

Ranchi nung Arogoi Covid agi shirangertem nem chiyungtsü agütsür



June 2 nü Ranchi nung Arogoi Rajendra Institute of Medical Sciences hospital nung Covid agi shirangertem yariba project tenzükdang tangokba noksa nung angur.

Ranchi, June 03, 2021

(Agencies): India kübok Jharkhand state nung Arogoi coronavirus agi shiranga hospital nung amongertem aser parnok anükertem nem süngjanglijang aser nutrition supplements densema chiyungtsü balala agütsüdar.

Taoba ita nunga Ranchi nung aliba Arogoi Rajendra Institute of Medical Sciences (RIMS) hospital kima shiranger kibongtem nem chiyungtsü lema agüja liasü.

June 2 nü Ranchi nung coronavirus agi shirangertem aser parnok anükertem yariba project tenzüktsüdang Ranchi nung tongti putir, Felix Toppo-i, "Arogoi sensakertem aser timtemer atema bilemstür. Tamalen iba project takok ngua inyakba sülen maneni Ranchi nung aliba RIMS nung shiranger 300 dak tema nem anogo shia chiyungtsü agütsütsü atema iba project maneni tenzükter," ta metetdaksü.

"Iba hospital-i kanga sensakertem arur. Sorkari parnok nem chiyungtsü agütsür saka shirangertemi süngjanglijang, amtsük, juice,

mineral water aser chi tajung mangur, anungji Ranchi Arogo aser Ranchi Catholic lanurtemi anogo shia shirangertem nem item chiyungtsü agütsütsü," ta pai metetdaksü.

Ranchi nungsa putir, Theodore Mascarenhas-ia, Catholic lanurtemi ita ka dak tema anogo shia RIMS kimalen nisung 800 tema nem chiyungtsü agüja arudar, ta metetdaksü.

Arogoi maneni shirangertem aser parnok kibongtem nem hopta ana atema jang, menjang, alo, totzü, metsü aser piaz agütsütsü sentong lir.

Yaküm March ita nung mezüng wara anema linük shibangba mapang nungi tenzüka Ranchi nung Arogoi kin mesüra yimsü kecha mebendangi timtemer ajak yaria arudar.

Yaküma Arogoi Dom Koch shanty nung kibong 50 aser Kafur shanty nung kibong 90 nem jang aser azüngken densema chiyungtsü balala agüja liasü.

Coronavirus wara maneni prokba nung ajemdaker Jharkhand sorkari June 10 tashi state shibangtsü telemtetba agiogo.

OLONG PAITEP # 5833

1			2					3		
4							5			
						6				
			7							8
		9								
							10			
11						12				
13										

TIPILEN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5832 TELANGZÜBA

LANGTSÜNGLEN :	TIPILEN :
1. Yongya, 2. Moko, 3. Marok,	1. Yimlibilem, 4. Anak, 5. Tangar,
5. Teronem, 6. Nung, 8. Amajok,	7. Aya, 8. Arong, 11. Par,
9. Jangzü, 10. belem, 12. Rong.	13. Lemjem, 14. Oagi, 15. Mulung.



DR.ALOKBAR KIBONG NUNG KONDOKOL :

Dr.Alokba : Honey, na aritepyonga ni langka shidi ni?
Warakla : Karaa shiang-, ni mahela pur meetingi taor.
Dr.Alokba : Ina, kü den clinic nung inyakla Lilyla to tanur bener mashisa kümer ati-i.
Warakla : Waa tanur benkaji mashisaji takümer aja aji. Health junga alir metenbo Lilyla ang masü nü den inyaker Rosela nungera benloktsüaja aji.Ni taor!
 (Ita ishika lir nübur ajaki Lilylai bena aliba tanur tebuji Dr.Alokbaa ta Waraklai meteta aküm)
Warakla : Azü-ak sang Alok, kechia ta ya ajaki jembiba ya shitak südi?
 Lilyla nüna otsüya?
Dr.Alokba : Wa ni ita ishika lia ni nüdang shidi asünung nai mangai oadok nung koda.Nai sahiba ama Lilyla ang maha Rosela a ümmm...
Warakla : Oh Alokba! Ana tebalar!!

Lilir : WhatsApp

TANÜBO NAI LANGZÜANG

Q. Koba company ajanga mezüng 'Nano Urea' saya?
 A. National Fertilizers Limited B. IFFCO
 C. Rashtriya Chemicals & Fertilizers D. Chambal Fertilisers
 (Taruba adok nung onoki langzütsü)
YASHI ADOK TELANGZÜBA : Israel

AO OSHI ANGAZÜKDAK:
TANÜ ANGAZÜKTSÜBA OJANG

Jenlok
 (v) tzüjang ama lua anen (drip)
 * Shi nungi temo jenzüka alua kü tula nung **jenlok**.

Jenshi
 (v) tsübuba agi nisungtem tesem balalalenia aritepa oadokba / miimshia senzü (escaped separately out of fear / absonding)
 * Tsükchirtemi amak dang sapaitem ajak jenshia ao aser tang tashi parnok arem nung **jenshia** senzür.



NAI-A YA METETTER MA?

- JUNE 04 ANOGO ASOR TONGTIBANG NISUNG KAR:**
- England Chuba, George III (1738)
 - Actor Rosalind Russell (1907)
 - Actor Dennis Weaver (1924)
 - Actor Bruce Dern (1936)
 - Singer Freddy Fender (1937)
 - Singer/actor Michelle Phillips (1944)
 - Actor Parker Stevenson (1952)
 - Singer El DeBarge (1961)
 - Fashion designer Mossimo Giannulli (1963)
 - Actor Scott Wolf (1968)
 - Actor Horatio Sanz (1969)
 - Actor Noah Wyle (1971)
 - Comedian Russell Brand (1975)
 - Actor/filmmaker Angelina Jolie (1975)
 - Actor T.J. Miller (1981)
 - Model Bar Refaeli (1985)
 - U.S. Olympic figure skater Evan Lysacek (1985)
 - Actor/musician Quincy Brown (1991)
 - Anil Ambani (1959)
 - Allan Octavian Hume (1829)
- 
- Model Bar Refaeli**

SUDOKU # 5875 TELANGZUBA # 5874

	6	1		7	3	2	4		9	4	6	2	1	7	8	3	5	
3				8		6			1	2	8	7	5	3	6	1	4	9
				9	1		6			5	1	3	4	9	8	6	7	2
	4	5	7			3		8	6	3	5	7	8	9	4	2	1	
	8	3	6				9	7	7	2	4	1	5	3	9	8	6	
	1	9		2	8				8	9	1	6	2	4	7	5	3	
		6				9			4	7	9	3	6	2	5	1	8	
9		8				7		6	3	5	8	9	7	1	2	6	4	
	3	7	1	6	9	8	5		1	6	2	8	4	5	3	9	7	

OJANG LUTEP # 5419

SHIÜKSATSHIA :

SÜA :

NGDA :

NGINUBO :

URCTEBHI :

MEKÜR :

KIAJA :

GUNA :

ÜAS :

TUNGBAJA :

OJANG LUTEP TELANGZÜBA # 5418

KECHIBA CORONAMOZÜYAMA KANGSHIAAGIDAKTSÜTSÜ
 NÜBURTEM NEM NUNGPET ANUNGER

TAN HOPTA ATEMA - KOMA SÜLA ?

Q. Asenok Aotsür Aor kidang tangar nisung kilir mayu nunga koma süla ?



Coimbatore, June 03, 2021: Brihostibarnü Coimbatore nung DMK tentetsang aser taoba mapang Tamil Nadu chief minister, Kalaingar Karunanidhi sor küm 98 ajungba anogomong nung party nung inyaktermi asür nem akhüm agütsüba noksa nung angur.

Centre-i states/UTs dang sensaker nem ration cards agüjang ta tuyur

New Delhi, June 03 (Agencies): Centre sorkari states aser Union Territories ajak dang National Food Security Act (NFSA) kübok teyari agütsütsü atema loktiliba nung sensakerter aser timtemertem jangjaba sülen ration cards agüjang, ta tuyuogo.

Linük nung kanga sensakerter aika tang chiyungtsü jang maka aser parnok ket nung ration card mali, ta osang aika angazükba sülen Centre-i iba tetuyuba agütsüogo.

Brihostibarnü osangbenertem senden ka nung jembidang Food Secretary, Sudhanshu Pandey-i, states aser Union territories-i National Food Security Act kübok ano ration card crore 1.97 tali agütsütsü akok, ta metetdaksü.

Tang tashi nung India kübok state 14 nungbo lemzüksüba ration card ajak agütsüogo.

Tang coronavirus wara nung ajemdaker food ministry-i, NFSA kübok züngsemstsü atema sensakerter aser timtemertem jangjaba sülen temsüa alirtem nem ration card agütsütsüji kanga tongtubang, ta metetdaksü.

Bodhbarnü food ministry-i states aser UTs ajak dang yimti/jila aser yimtsüing ajak nung kanga sensakerter jangjaba sülen NFSA ration cards agütsütsü atema maparen tenzükan, ta metetdakja liasü. Ajisüaka state temi pei nem lemzüksüba quota dak tali agütsütsü makok, ta food ministry-i metetdaksü.

Ministry-isa states aser UTs dang ki malirtem, jana bendena ayokertem, osangkaket alemertem aser rickshaw atsüertem ama sensakerter nem ration card agüjang, ta ashi.

Tang coronavirus wara

mapang nung kanga sensakerter jang maliba den külemi parnok ket nung ration card maliba indang osangkakettem nung adokba den külemi melungtet telok aser lokti lenir aikati iba tebilemstsü atema ola adoka liasü.

Ki malirtem ket nung address proof maliba agi parnoki ration card mangur, anungji parnok nem ration card agütsütsüla, ta Ministry-i metetdaksü.

NFSA kübok sorkari ita shia nisung shia nem wheat aser jang seret 5 agütsür, aser ibaji seret shia nung sen 2-3 agidang agütsür. NFSA kübok nisung crore 80-i iba tajangzüik agidar.

Centre sorkari minimum support price (MSP) jenjang agi aluyimertem dang nungi wheat aser jang alizüker aser iba Act kübok sensakerter nem jenjang dalang agi agütsür.

DMA-i ken o agütsüba nung ajemdaker Delhi HC-i Ramdev jaoker

New Delhi, June 03 (Agencies): Delhi Medical Association (DMA)-i yoga tesayur, Baba Ramdev anema ken o benokba aser pa dang Patanjali indang Coronil kit agi coronavirus tashidak aneper ta osang prokba anenang, ta metetdaksüba sülen Brihostibarnü Delhi High Court-i Ramdev dang court-i arutsü

metetdaksü. High court-i Ramdev indang counsel dang, July 13 nü iba ken o mangadang tashi Ramdev dang tashishitsü o kecha tejemi, ta metetdakjang ta tuyu.

DMA-i, Ramdev-i jembiba o nungji tashishitsü keta lir, kechiyong Coronil kit mozü ajanga coronavirus tashidak maneper, ta metetdaksü.

High Court-i DMA dang-a, "Nenoki court mapang indokdaksüba dang nungibo iba wara atema taneptsü bushiba nung ang mapang indoktsüla," ta ashi.

DMA atema ken o jembitsür Advocate Rajiv Dutta-i, Ramdev-i jembiba o ajanga nisungtemi vaccine agitsü mejangratsü, ta metetdakja liasü.



June 03, 2021 nü Patiala nung ETT TET Qualified Unemployed Teachers Union Punjab züngsemtemi Punjab state sorkar dang mapa meshia fountain chowk mokdang longkak aitba noksa nung angur.

India nung ano nisung lakh 1.34 dak Covid putet aser 2,887 asü

New Delhi, Aami/June 03 (Agencies): Tesüiba anogo tenet tashi India nung anogo shia coronavirus case lakh 2 den tekübokba puteta arudar aser tesüiba ghonda 24 nunga linük nung nisung 1,34,154 dak coronavirus putet aser iba tashidak agi nisung 2,887 asü, ta Brihostibarnep Union Health Ministry-i metetdaksü.

Tesüiba ghonda 24 tsungda coronavirus agi shiranger 2,11,499 anepogo aser tang iba tashidak agi teshirangdakpur 17,13,413 lir.

Tanü agi anogo 21 tashi anogo shia coronavirus tashidak putetba dang nungibo iba tashidak agi shiranger anepertem timba, ta Health Ministry-i metetdaksü.

India nung tang tashi nung iba tashidak agi shiranger 3,37,989 süogo aser nisung ajak agi 2,84,41,986 dak iba tashidak putetogo.

Bohhbarnü linük nung Covid samples 21,59,873 tendangogo, ta Indian Council of Medical Research (ICMR)-i metetdaksü.

Yaküm September 16 nü India nung coronavirus case lakh 50 ajung, September 28 nü lakh 60, October 11 nü lakh 70, October 29 nü lakh 80, November 20 nü lakh 90 aser December 19 nü coronavirus case crore 1 ajung. Taküm May 4 nü India nung coronavirus case crore 2 ajungba sülen ano coronavirus case lakh 84 bendenloksemogo.



June 03, 2021 nü Border Security Force (BSF) sepaitemi Bikaner arrtsü nung sen crore 3 jenjang temesepba mozü apuba sayaba noksa nung angur.

Sustainable Dev. Goals Index temaba jenjang nung Kerala lir

New Delhi, June 03 (Agencies): Kerala-i maneni Sustainable Development Goals Index 2021 nunga temaba jenjang nguogo aser iba Index nung state tamajungtibaji Bihar lir.

Brihostibarnü Niti Aayog-i iba Index report sangdonga liasü.

Index for Sustainable Development Goals (SDGs) ya loktiliba, rongsenkettüing aser environment lenlatem nung states aser union territories terenlok jenjang asadangba lir.

SDGs nung Kerala-i score 75 ngua temaba jenjang angu aser tanabuba jenjang state ana-Himachal Pradesh aser Tamil Nadu nati angu.

Taküm iba Index nung state tamajungtiba asemji Bihar, Jharkhand aser Assam lir.

SDG Index report tasembuba ya Brihostibarnü Niti Aayog Vice Chairman, Rajiv Kumar-i metetdaksü.

"Asenoki SDG India Index aser Dashboard ajanga SDGs asadangba atema alimai tenüsang agütsür," ta Kumar-i metetdaksü.

SDGs ya mezüing 2018 küm December ita nung tenzüka liasü, aser iba ya linük nung terenlok asadangba tongti hadir ka lir. Iba index ya India nung United Nations den senteper yanglur.

2018-19 küm mezüingbuba SDGs nung goal 13, target 39 aser indicators 62 liasü, tanabuba SDGs nung goal 17, target 54 aser indicators 100 liasü aser tasembuba SDGs nung goal 17, target 70 aser indicators 115 liasü.

Gautam Gambhir Foundation-i ozüing alema Covid mozü rizüing: DDC

New Delhi, June 03 (Agencies): Brihostibarnü Delhi drug controller-i High Court dang, taoba mapang cricket asayar aser tang BJP MP, Gautam Gambhir indang Foundation-i ozüing alema coronavirus indang mozü balala alir rizüing lemshiba bushitetogo, ta metetdaksü.

Drug controller-isa, Gambhir indang foundation aser drug dealers nem tekaraba nung temerenshi agütsütsü, ta metetdaksü.

Drugs and Cosmetics Act ozüing kübok nungsa MLA,

Praveen Kumar-a aitsüogo, ta Delhi High Court nem metetdaksü.

Iba dak sendakba nung court-i drug controller dang hopta trok tsungda maneni osang bendenang, iba sülen July 29 nü maneni iba ken o angadangtsü, ta metetdaksü.

BJP MP Gautam Gambhir-i coronavirus tashidak agi shirangerter anepaluba mozü-Fabiflu aika koma alidena rizüingar ibaji jungjunga bushisüing dang masüba atema Hombarnü Delhi High Court-i drug controller arrja liasü.

Tzü telungi aluba rong ajanga Sri Lanka timtem ajurutsü

Colombo, Aami/June 03 (Agencies): Tzüyim tarokleni atsür aotsü merangba khu abenba rong ka tzü telungi aluba sülen Sri Lanka ketdangsürtemi iba rong nungi totzü inshiba azüoktsü renemer.

Singapore nung zülüoka aliba X-Press Pearl rong ya Colombo nung rong anendak anasa hopta ana shi mi adoka rong a liasü. Iba rong tema shilem karbo tzüyim telung tongogo.

Iba rong indang totzü pongdang nungi totzü tonne noklang aika yimshia temeket nung aliba tzü shiruru asütsü aser tükum menentsü, ta mongintemi ashir.

Oil dispersants, booms aser tzüma nung totzü bendenba hadir tem renema lir, ta parnoki ashir.

X-Press Pearl nungya nitric acid tonne 25 den danga chemical aser cosmetics tem bener lia May 20 nü mi jangru. Hopta tetenzüklen iba rong nung mi tulu jangrua aliba meremspand iba rong nung container 1,486 aliba nungi aika tzü nung tsüka liasü.

Iba rong nungi shopping bag yangluba oset, plastic pellets tejang million aika Sri Lanka anüolen tükum sünga lir.

Negombo yimti anasa aliba tükum densema shibangtsüsa iba rong ajanga timtem bener arutsü. Tzü nung aliba pellets tem yagi India, Indonesia aser Somalia tashi aotsü, ta mongintemi ashir.

Ketdangsürtemi mi jangrua aliba rong ya tükumlen nungi atsür aotsü merang. Saka iba rong tesülen ya tzüyim tarok nung feet 69 shi lur ali nung

mena lir aser tejaklen ya tanemi atsüoka ayir, ta ashi.

Tzüyim sepaitem indang rong aser tayimtsü amshia iba rong nungi totzü prokshiba mita arur, saka tzüngsang majungba ajanga iba maparen nunga tetsükdaktsü ajurur.

"Tang tashi iba rong nungi totzü yimshiba mali, saka renema atar," ta navy odongtar Indika de Silva-i osangbener dang ashi.

"Rongnentsü yagi ali tonga luaka rong temalen yabo tzüma nung lir," ta ashi.

Iba rong ya tanaben tzümai adokdakja tzü tarokleni atsür aotsü teimla nung ketdangsürtem rong telungi aitsü meranger, ta Sri Lanka Ports Authority Harbour Master Nirmal Silva-i ashi. Saka tzüngsang majungba ajanga mapa meinyakteter, ta pai ashi.

"Iba rong nung mi adoka arongba yimya nung totzü rongdokmar alitsü amai mongintemi ashir, saka tensa tamajungba atema onok renema lir," ta Capt Silva-i ashi.

Iba X-Press Pearl nungya bunker fuel oil ton 278 aser gas oil tonne 50 lir. Ajidang masü container 20 shi sünga lubricating oil lir.

Iba lendong atalokba atema Sri Lanka-i bushisüngdang tenzükogo.

Singapore nung aliba ketdangsürtemia par tsütsü bushisüngdang tenzüka lir.

Meter 186 talang X-Press Pearl rong ya India nung rongnendak Hazira nungi Colombo-i May 15 nung apuso aser Colombo rongnendak rongnentsü yokba sülen mi ya adoka liasü.



Sri Lankan Air Force ajanga agütsüba noksa ka nung MV X-Press Pearl rong Kapungoda nung telungi aluba angur, koba rongnentsü ya Colombo port, Sri Lanka nung yoka liasü. Ketdangsürtemi iba rong ya atsür aotsü meranger, kong chemicals bena liasü aser Bodhbarnü nungi tzüyim telungi alu tenzük.

Myanmar activist temi mitkar anema ajungbena longkak ait

Yangon, Aami/June 03 (Agencies): Mitkartemi yimsü asüba anema Myanmar nung yimti tulutiba, Yangon nung democracy busemer 400 shi Brehostibarnü adenshia longkak aita liasü.

Election ajanga shimtetba Aung San Suu Kyi'er sorkar mitkartemi tashiyim amshia atsüngdoker la den lar party lenirtem puer ita pezü dak tema oaka mitkartemi nüburtem mazüokteter aser yamaji mitkartemi longkak aiter lenirtem pua merenshiaka nüburtemi tsüba mali.

"Parnok nem yimsü mesüdaktsütsü ta sayutsü mechi tanü onok longkak aitsü adenshi," ta activist aser taoba mapang political prisoner,

Zayar Lwin-i osangbener dang ashi.

Mitkartemi sorkar atsüngdokba sülen ita ka-ana longkak aitba mapang sepaitemi longkak aiter dak injang khalokja arur tang sepaitem nungi jembutsü mechi yimti tulu nung longkak aiter tali kumdangtsüsa kumogo, aser parnoki 'flash mobs' yimya amshia kanga kera senshir.

Mitkartemi sorkar atsüngdokba anema longkak aitba manentsü, ta Zayar Lwin-i nangzük, ajisüaka Yangon nung sepaitem jenti aliba mechi lokti ayongzüktsü tasakba kumogo, ta pai ashi.

"Onoki ajurutsü lendong tilabaji onok aputsüba aser tulubaji tepsettsüba lir," ta pai

ashi aser Brehostibarnü minute pongu shi longkak aitba mapang nisung ana dang apu, ta ashi.

Mitkartemi sorkar atsüngdokba sülen security forces temi Myanmar nung nisung 842 tepsetogo, ta activist telok kati ashir. Taoba ita mitkartemia nisung 300 jungnüa süogo, aser yangji police 47 dena lir, ta ashi.

Yimti aser jila tulu nung ama yimyak-yimtsüngtem nunga nisung jenti süogo, kong tashi tait Myanmar mitkar aser ethnic minority army mesüra tang tasen tentetba People's Defence Forces tsüngta raraba ajanga nisung meyerijang aika tesem balala nung prokshia lir.

Anogo ishika tsüngta Israel nung sorkar tasen tentettsü akok

Jerusalem, Aami/June 03 (Agencies): Israel Ato Kilonser Benjamin Netanyahu atsüngdoka centrist aser right-wing party temi sorkar ka tentettsü tezüngzüktep agiba anema pai Brehostibarnü nokdak.

Küm 12 ato kilonser inyaka alisang Netanyahu-i Twitter nung, "Right telok nungi vote agüja shimtetba legislator ajungai lendong aketba left-wing sorkar anema nokdaktsüla," ta ashi aser iba teloktep nung Arab nung adenba aitsü.

Bodhbar aonung ayatirm nung süzkütsüba mapang tembangtsü minute 35 shi lia centrist nungi yimsüsür Yair Lapid-i teloktep sorkar ka takok ngua tentetogo, ta sangdongba sülen right-wing lenir yagi social media nung aitsü.

Iba tezüngzüktep kübok arishi küm 49 tain nationalist Naftali Bennett, shiba taoba mapang defence minister inyaka

liasü aser high-tech millionaire ka lir, pa ka ato kilonser akumtsü aser küm ana shi tsüngta nung taoba mapang TV host aser finance minister inyaka alisang arishi küm 57 tain Lapid nem melenoktsütsü.

Parliamentary senden ka nung sorkar ya simple majority ajanga agizüktsü, koba anogo 12 tsüngta maparen tembanga arutsü akok, ta far-right nungi yimten yimsüsür Avigdor Lieberman-i ashi, shiba coalition tasenba nung züngsem lir.

Netanyahu sülen anidaker aser parliament indang Speaker yagi tekeraba nung vote agitepba nokdangtsü merangtsü imlar, aser ato kilonseri iba mapa ya amshia pai lenmang kar bushitsü akok.

March 23 election nung Netanyahu'er Likud party aser par den sendaktepa alirtem mesüra par den tokteperitemi legislature nung sorkar tentettsüsa menden mongutet. Iba ya Israel nung küm ana

tsüngta election pezüba liasü.

Sorkar tentettsü asoshi tang jembishinürtem rongnung political party tila aser tulu meyoktepa lir, aser item rongnung tang mezüngbuba süa shilem 21 aliba Arab minority, United Arab List (UAL) dena lir.

Mapang ka vote agütsüba tesem sünga Arab nung adenshia lir, anungji oa vote agüjang ta ajungshisang Netanyahu-i Twitter nung UAL lenir Mansour Abbas den tesendaktep tasen aliba indang shia liasü.

Netanyahu-i Bennett indang video tejen ka post sütsü aser 1992 küm Israel nung aliba Arab sensotemi sepaitem tepsetba sülen Abbas-i kiralongrar nisung tepsetertem tepuokdak lia semdang, ta ashi.

Sorkar tentettsü teimla aliba party züngsemtem ya Netanyahu atsüngdoktsü tejangraba aliba dak alaka parnok tangatetba balala lir.

Netanyahu ya ochimashi mapa inyakba atema ken o benoka lir, saka pai aibelen masü ta ashir.

Sorkar tentettsü asoshi lungjamba teloktem ya Bennett'er Yamina (Rightward), Defence Minister Benny Gantz-i aniba centre-left Blue and White, left-wing Meretz and Labour party tem, taoba defence minister Lieberman'er nationalist Yisrael Beitenu party aser taoba education minister Gideon Saar-i aniba right-wing New Hope party tem alitsü.

Netanyahu yagi Yamina züngsem kar anioktsü imlar, shirnok Arab aser leftist ozüng yanglurtem den oa adenba atema mepelai lir.

"Onoki iba mera tenzük, saka merenemtet. Anogo 12 lir, koba temela masütsü, aser tatem nung sorkar ka alitsü," ta Lieberman-i Channel 13 TV nung ashi.

Züngsem 120 aliba Knesset nung Netanyahu kübok menden 30 lir, koba Lapid'er Yesh Atid

party dang anasü shi agi timba, aser pa ya tamangba yimsü aser nationalist party asem den sendaktepa lir.

Pa ato kilonser ama inyakba mapang Netanyahu ya linük aser bendang lima nung kanga wangshia liasü.

Pa anema ken o benoka aliba mechi Israel lenir melentsüla, ta pa den tokteper temi ashir, aser pa kümsük tasen ka inyakba mapang pa anema ken o balala benokba nungi pa kumzuka ayutsüsa temzüng kar yanglutsü akok, ta ashir.

Sorkar tasen ka tentettsü aliba yagi mangatetep aliba ken o tem mejembitsü, ta ashir aser item rongnung Palestine nungeri par linük kumdaktsünüba occupied West Bank dena lir. Bennett-i taoba mapang iba tesem ya amokbanga yimsü asütsü jembia liasü.

"Iba sorkar yagi rongsenketsüng nung tali rangloktsü," ta Lieberman-i ashi.

Tajung Samaria telok kati nübur yaridar



Guwahati, Aami/June 03, 2021: Tajung Samaria telok - 'The Civic Wheels' pur külemi tangokba noksa ka yangi angur.

Guwahati, Aami/June 03, 2021 (Agencies): Nagaland kübok jila tezü ka nung Covid-19 Vaccination drive mapatong ajungkettsütsü nükjiding yur tajung Samaria telok kati teyari agutsüdar, ta sangdong ka ajanga metetdaksü.

Züngsem trok aliba tajung Samaria telok nung, cancer tashidak nungi taneptsü angur tetsür ka tenüing agi Venkangshu aser Phelem Naam (woman priest) na dena lir; aser nübur ajunga ayimjema Vaccination drive takok ngua agitsü atema par teloki nüburtem senzusenbongtsü gari agüja Mon district administration nungita yaridar.

Administration-i Mon Town kübok ground nung iba Vaccination Drive ayongzüksü lemtetba sülen, nüburtem senzusenbongtsü atema gari peria makaba ajanga tetsükdaksü adoka liasü. Iba ama mapang nübur rokongba ajiteta, tajung Samaria nübu trok yagi nübur tenzüksü asoshi telemetba agi.

Mon District Magistrate, Thavaseelan K-i, 'The New Indian Express' dang, arishi küm 45 temapurtemi vaccine agitsü atema maruba asadangteta, iba vaccination drive ya mozüki nung mesüi tangalen ka ang achaayanga agitsü telemetba agia liasü, ta metetdaksü.

"Tang ama tensa tamajungdang, mozüki bushia oa/sem dangtsü atema nübur aikati tsübu aser arendaka bilemba kuliji mezüing alitsü. Iba yongji, tetsübu mesüra timtem kecha melii iba Vaccination drive yimya balaka nung achaayanga agitsüla ta onoki bilem. Item ajaki asadanger

sülen, onoki Mon kübok Local Ground nung iba drive sentong tenzüksü. Iba vaccine agitsü atema nisung 80 shi aruogo," ta Thavaseelan-i ashi.

DM-i ashiba agi, volunteer trok (Tajung Samaria telok) yagi pei pei nija gari amshia iba vaccination drive maparen nung nungita yaridar aser administration ajanga agütsüba gari totzü tasüsa parnoki magizük.

"Hopta shia onoki iba vaccination drive sentong ayongzüksü tebilemba lir. Gari malir kar danga lira, item volunteer den tongtepratepa iba service agitettsü akok. Parnok tsüingdong tonga aruagi pa/la (Vaccine agitsüpur) ground tashi anir arutsütsü aser vaccine agir sülen tanaben parnokisa ki tongtsütsü. Parnoki inyakba service ya onoki osang kaket aser social media nung prokshiogo," ta DM-i shisem.

Iba voluntary service ya local social worker, Hongnao Konyak (40) indang tasa liasü. Tanünga nübu pungo ya pai Facebook ajanga ayongden.

"Par pungopronglai iba mapatong nung yariteptsü tejangrar lemsatepba sülen, social media sabang ajanga onoki pei pei indang mobile phone number lemsatep. Onoki iba service maneni tejakleni bener aotsü aser nüngdakba mapang yariteptsü molunga dang lir. Onoki iba telok dang 'The Civic Wheels' nüngja agütsüogo," ta pai ashi.

Cancer tashidak nungi taneptsü angur aser arishi küm 35 tain, Affee Venkangshu-i ashiba agi, Hombarnü iba maparen nung mezüing ajemoka inyakba mapang, nisung pezü

tashi yariogo.

"Parnoki (vaccine agitsüpur) phone ajanga kü den tongtepratep. Lokti atema langka tajung inyaksüdang jangratema bilemer," ta Affee-i ashi.

2014 küm Affee dak cancer puteta liasü aser lai tang 'forest management' atema Konyak Tribal Welfare Society ta nüngja agütsüba NGO nung inyaker, ta sangdong nung shia lir.

Phelem Naam ya Mon district nung woman pastor inyaker aser lai ashiba agi, iba service nung meinyakdang mapang shia tantsü-tambu tem yaria aruogo.

"Taoba mapang, nisung aika den kü ph.no lemsatepogo. Tantsü tambu tem tesem ka nungi tesem kati tonga meinoktsütsü atema teyari agütsüogo. Iba ama mapa inyakdang jangratema den külemi temoatsü angur," ta lai ashi.

Iba service ajanga tajangzük angur Shemouh Konyak-i 'The Civic Wheels' nem tenüingsang agütsüogo.

"Kü ket nung gari mali, saka nüngdakba mapang teyari nguogo. Parnok rongnung ka (Affee) dangi phone ajanga ola osang agitepba sülen, yakta dang lai ozü ki tashi tonga aru. Lai Vaccine agiba tesem tashi anir ao aser tanaben ki tashi laisa meinoktsü," ta Shemouh-i ashi.

Maneni, The Civic Wheels' telok nung tanga züngsem asemji NGO nung inyaker Sashi, Sorkar tenzüksü wadang nung inyaker Shongwang aser school tesayur Tingmei Wangshu nung alitsü, ta kasa sangdong ajanga metetdaksü.



Dimapur, Aami/June 03, 2021: Tang tagidak aliba Vaccination maparen asadangshitsü atema, Bodhbarnü (02.06.2021) MLA, Eshak Konyak-i CHC Aboi semdangba mapang tangokba noksa ka yangi angur. Iba health centre nung electrical wiring tejen yanglushitsü atema Eshak-i sen 50,000/- tenla agütsüogo. MLA, Eshak Konyak den ADC Aboi, Chumlamo Humtsoe, külem party nung inyakerter aser DBs temi iba Centre semdang. Iba mapang, SMO, Dr. Neiphrezo Sorinuo-i, CHC Aboi nung medical staff peria maliba indang timtem lemsatep aser nübur balalai CHC Aboi nung tenla agütsüba indang tongmelang agi metetdaksü.

Mulungnen O



Ozü temeim tsürabur asür **T.SENTIKALA** (YAJANG) shiranga aliba mapang aser la 24:05:2021 anogo nung iba lima nungi pilar, onok timtem aser mangyim jashi nung alidang, shirnokisa onok dang meima sarasadem, nübo aser rongsen agi yariogo, nenok ajak den onoki kanga pelaba lemsateper.

Onoki nenok nisung shia tsüingdong arua pelaba meshitetaka, Tulusang Tsüingremi nenok talubosa moajangma ta onoki sarasademtsür.

- Temeim jabaso aser kinungertem.

SÜR KÜM 8 AJUNGBA BILEMTETER

Asür **S. Achila** (Chuchuyimlang) || ASÜ : June 4, 2013

Oja, onoki ali shi nung na angutsü aser nü teka nung amittsü makok, saka onok mulungjang nung na tetidang lir.

-Temeim Chirnurtem.



Security Forces-i NSCN (R) telungpur ana apu

Dimapur, Aami/June 03, 2021 (TYO): Hombarnü (31.05.2021), State Police den Security Forces longjemer Dimapur District kübok Chekiye Village mita aoba mapang NSCN (R) indang telungpur ana apu, ta sangdong ka ajanga metetdaksü.

NSCN (R) ajanga MSF Andhra Fish Company indang ajemdaker, Security Forces den State Police longjemer Chekiye Village mita aoba mapang NSCN (R) indang telungpur ana ya apu aser tena ket nungi UT-1 NSCN (R) indang extortion slip tem ngutet.

Iba maparen dak sendakba nung maneni bushisüingdangtsü atema, pua alir telungpur ana den tena ket nungi ngutetba oset ajak Diphupar Police Station, Dimapur District nung agütsüogo.

Kasa anogo, Security Forces den Arunachal Pradesh State Police longjemer Wakka-Khanu, Tirap District kübok general area' mita aoba mapang temesepba mozü shibelener ka apu.

Osang tejangja ka angazükba nung ajemdaker, Security forces den State Police longjemer Wakka-Khanu mita aoba mapang, temesepba mozü shibelener ya apu aser pa ket nungi heroine ngutet.

Iba maparen dak sendakba nung maneni bushisüingdangtsü atema, pua alisang aser pa ket nungi

ngutetba heroine ajak Wakka Police Station, Tirap district nung agütsüogo.

Deobarnü (30.05.2021) Security Forces den State Police longjemer Changlang District, Arunachal Pradesh kübok Bubang Village mita aoba mapang NSCN (R) indang telungpur ka puogo.

Osang tejangja ka nung ajemdaker, Security Forces den State Police longjemer team kati Bubang Village mita aoba mapang NSCN (R) telungpur ya apu.

Iba maparen dak sendakba nung maneni bushisüingdangtsü atema, pua alisang ya Changlang Police Station, Tirap District nung agütsüogo.

Maneni, kasa anogo (30.05.2021) Security Forces-i Zubza, Kohima District mita aoba mapang temesepba mozü shibelener nisung ana puogo.

Osang tejangja ka angazükba nung ajemdaker Security Forces-i Zubza tesem mita aoba mapang nisung ana ya apu aser tena ket nungi sen 2, 15, 40,000 alang opium tejang aser cigarettes den sen 1, 32,000 aser tashishitsü aketba document tem ngutet.

Iba maparen dak sendakba nung maneni bushisüingdangtsü atema, pua alir ana den külemi tena ket nungi ngutetba oset ajak Customs Prevention Division officials, Dimapur District nung agütsüogo, ta kasa sangdong nung shia lir.



Tokyo, Aami/June 03, 2021: Aruya aliba Tokyo 2020 Olympic aser Paralympic Games mapang athlete tem takok anguba sentong nung amshitsü renemba 'medal tray' ka Brehostibarnü, Ariake Arena, Tokyo nung sayaba noksa ka angur.

India cricket team anaprongla England tongogo

London, Aami/June 03, 2021 (Agencies): New Zealand team den aruya aliba World Test Championship final aser asayamung ayonger team - England den Test series asayamung atema, India tebur cricket team anaprongla Brehostibarnü England tonga aruogo.

India tebur cricket team den külemi tetsür team-a arua liasü. Tetsür team-i England tetsür team den June 16, 2021 nü nungi tenzüka Bristol nung Test ka den ODIs asem aser T20s asayatsü sentong lir.

Top-order batsman KL Rahul-i Twitter ajanga team pur London tashi timtem kecha

melii atongba osang den külemi airport nung pa tangokba noksa ka lemsatepa liasü.

Team anaprongla indang indanga Southampton-i aotsü, kong temzüng agi melaba ama parnok ajak quarantine'asütsü.

Latettsüba quarantine' mapang tembanga aser iba tsüngda COVID-19 test inyakyim ajak tembanger sülen, June 18, 2021 nü nungi Virat Kohli-i aniba tebur team-i New Zealand tebur team den WTC final asayatsü.

World Test Championship final asayar sülen, India tebur team-i ano Nottingham nung August 04, 2021 nungi tenzüka England team den Test series

pungo asayatsü.

Covid-19 dak sendakba tzüzüng ozüng aser tekümdangtsü mera ajak nung anidaka, WTC final aser iba den atongsema England den Test series asayatsü atema India tebur team nung züngsem 20 dena lir.

Tetsür Cricket team indang Tour July 15, 2021 nü tembangtsü. India tetsür team-i England den June 16, 2021 nungi tenzüka Bristol nung Test ka den ODIs asem aser T20s kar asayatsü terenemba lir. Küm tenet nung India aser England tetsür team tsüngda mezüng Test asayar alitsü.

Tokyo 2020: Minister Kiren-i India indang Olympic Uniform saya


New Delhi, Aami/June 03, 2021 (Agencies): Union Youth Affairs & Sports Minister, Kiren Rijiju-i Brehostibarnü (03.05.2021) Indian contingent indang official uniform saya. Taruba ita nungi tenzüksü aliba Tokyo Olympics nung shilem agitsüpur India team-i iba uniform asemsü.

Küm pezü nung khen ayonga asayaba Olympics atema India nungi athlete 100 dak tema Tokyo-i yoktsü imlar. Iba Olympics nung India contingent nungi shilem agitsüpur rongnung PV Sindhu, MC Mary Kom, Bajrang Punia aser Neeraj Chopra nung dena lir aser linük atema parnoki medal takok angutsü imlar.

Kasa anogo (Brehostibarnü), iba Olympics atema athlete tem renemshiba maparen dak sendakba nung asadangshitsü atema Ato Kilonser, Narendra Modi-i senden ka ayonga agiogo.

"Tanü Ato Kilonser, Narendra Modi-i aruya aliba Tokyo Olympics atema athlete tem renemshiba dak sendakba nung asadangshia jembishinitsü asoshi senden ka ayongzük. Ato Kilonseri nübur ajak dang athlete tem pusema aser nungitsü asoshi mepishio," ta Rijiju-i ashi.

Küm ka dak tema thitema aruba Tokyo Olympics ya July 23, 2021 nungi tenzüksü sentong lir aser iba asayamung August 8, 2021 tashi asayatsü.



2016 küm, Rio Olympics nung India team-i medal ana dang takok anguba sülen, taküm asayamung nung India nung athlete temi medal timba angutsü nükjidong yur tokteptsü imlaa atar.

Rio Olympics nung India atema medal takok angur athlete anaji - PV Sindhu (silver in badminton) aser Sakshi Malik (bronze in wrestling) na liasü.

Tokyo nung Indian contingent-i taoba record ajangtetsü Rijiju-i imlar.

"India nungi shilem agitsüpur athlete temi taoba record ajangtetsüsa iba Olympics nung toktepa tanela reprangner. Nisung shia tebilemba balala lir aser nia osang tejangja balala ajanga angazükba nung ajemdaker asadangshio. Parnoki tajungtiba nung shilem agia takok bener arutsü imlaa atar," ta interview ka agiba mapang Rijiju-i ashi.

Volunteer 10,000 tashi Olympics nung shilem magitsü

Tokyo, Aami/June 03, 2021 (Agencies): Tokyo Games lapokba sentong agitsü anogo 50 dang lia, iba asayamung dak sendakba nung tebilemstü (Games thitemtsü mesüra asayatsü) aika aliba mapang ka nung, "Tokyo 2020 Olympic" atema shimba volunteer 80,000 nungi volunteer 10,000 jungnüa agi Olympics nung shilem magitsü lemtetogo, ta asayamung ayongertemi metetdaksü.

Tokyo 2020 chief, Seiko Hashimoto-i Japan saisapong osang agütsür tentet ka den jembiba mapang, iba Games anogo atsülangtsü asoshi sentong mali ta metetdaksü; aser asayamung nung shilem agitsüpur Japan-i arutsü thitem nungang iba Games thitsütsü akok, ta lai ashi.

Tang, Japan nung pezübuba coronavirus wara (fourth wave) adoka lir aser iba wave agi kanga mejungi kongshir alir tesem talisa Tokyo aser tesem kar nung 'state of emergency' sangdonger lir, koba Games

metenzükdang State of emergency ya ita ka tashi aotsü.

Bodhbar aonung tesü, Tokyo 2020 CEO Toshiro Muto-i local media dang ashiba agi, volunteer 10,000 tashi, shirnok iba asayamung tulu süsümedema asaya aotsü asoshi tongtibang nübutem liasü, coronavirus tetsüba ajanga item volunteer yagi Olympics nung shilem magitsü lemtet.

Parnok rongnung volunteer karbo iba Games küm tashi atsülangba sülen tukadok. Ano külen taoba mapang Olympic Chief Yoshiro Mori-i tetsür o tebur na bendanga jembiba ken o nung volunteer aikati iba Games nung madentsü lemtet.

Item volunteer ya Japan nung taküm iba Games ayongzüktsü asoshi nokdang nübür shilem 80 rongnunga dena alitsü akok, ta sangdong ka ajanga metetdaksü.

Ajisüaka, Tokyo nung alir nübur tsüngda rongnung iba Games asayatsü mesüra masayatsü pusemba asoshi tebilemba balala lemsatepba

asadangtetogo.

Muto-i ashiba agi, volunteer ajema akümba ajanga iba Games nung timtem madokdaksütsü, kechiyong iba asayamung shilem ajemdaksür asünung, nübu ishika dang nüngdaker.

Bendanglen nungi arur fans tem iba Games nung nokdangogo aser June 20, 2021 nü Tokyo nung 'state of emergency' tembangba sülen, linük nungi terepranger tem melatsü mesüra memelatsü asoshi tan ita tatemlen telemtetba ka agitsü imlar.

Iba Games nung bendanglen nungi shilem agitsüpur ketdangsurtem aser shilem agitsüpurtem (athelete) tesadangka tashi ajemtsüogo, koba 78,000 jungnüa alitsü. Item nungi ano ajemdaksütsü asoshi asadanger.

Tokyo Games asayatsü renema dang lir aser shilem agitsüpur den Japan nung alir nübur atema timtem kecha melii iba asayamung ayongzüktsü, ta Brehostibarnü interview ka

agiba mapang Hashimoto-i lephsia metetdaksü.

"Tanga linük balala nung tensa mejungi aoba ajangshia aser linük timba nungi shilem agitsüpur tem marutetsüsa kümra, onoki iba Games ayongzüktsü makoktsü. Ajisüaka, iba amala tensa marura, Games thitsütsü tebilemba mali," ta Nikkan Sports Hashimoto-i ashi.

Tang hopta tetenzüklen, Olympics atema Australia indang softball team pur Japan tonga aruogo, koba asayamung atema Japan tonga arur Olympic athlete telok rongnung parnok mezüng kümogo aser iba jagi asayamung ayongertem nem teimla ka agütsüogo.

Japan nung vaccine campaign tem kara aoer asünung, iba asayamung ayongtsü asoshi Japan nung nübur tebilemba melenshitsü

akok, ta Hashimoto-i bilemba ka lemsatep.

"Vaccine campaign takaraba nung achaayangra, Olympics asayatetsü akok' ta nüburtemi tebilemba lemsatepba onoki angashir," ta lai ashi.

Covid-19 agi kongshir alir tanga linüktem den medemdangra, Japan nung Covid-19 wara prokba ya kanga agi tajemba lir. Linük nung iba wara adoker külen nungi nisung 13,000 dak tema süogo. Tang tashi nung Japan kübok nütsüng yongsük shilem 100 nungi shilem 2.9 jungnüa vaccine agiogo.

A medal tray that will be used during the victory ceremonies at the Tokyo 2020 Olympic and Paralympic Games is displayed during its unveiling event at the Ariake Arena, in Tokyo.

BILEMDANGANG

"Yimtsü yimbu jashidaksüra yimti nung lanu tajung memoar."